



Broj: 06-08-1-3918-5/2025
Sarajevo, 17.12.2025. godine

SVIM SUDOVIMA U BOSNI I HERCEGOVINI

N/r predsjednika sudova

PREDMET: Dostavljanje statističkih podataka o radu sudova za 2025. godinu i ocjenjivanje rezultata rada nosilaca pravosudnih funkcija u sudovima za 2025. godinu, *traži se*

Poštovani,

Visoko sudsko i tužilačko vijeće Bosne i Hercegovine (u daljnjem tekstu: VSTV BiH) poziva predsjednike sudova da dostave podatke o radu sudova za 2025. godinu i provedu postupak ocjenjivanja rezultata rada nosilaca pravosudnih funkcija u sudovima za 2025. godinu.

Napominjemo da će VSTV BiH, za potrebe izrade odgovarajućih dijelova Godišnjeg izvještaja VSTV BiH za 2025. godinu, iz Sistema za automatsko upravljanje predmetima u sudovima (CMS) preuzeti statističke podatke o radu sudova za prethodnu godinu. Podaci će se preuzeti iz CMS-a 15.01.2026. godine, nakon završetka radnog dana.

U cilju efikasnog provođenja postupka izvještavanja o radu suda i ocjenjivanja rezultata rada nosilaca pravosudnih funkcija u sudu, **neophodno je da se blagovremeno upoznaju sa ovim dopisom i svim materijalima koji će se koristiti u ovom postupku:** predsjednik suda, nosioci pravosudne funkcije u sudu, sekretar suda i drugi uposlenici u odjeljenju sudske uprave, šef pisarnice i odgovorni uposlenici u pisarnici suda i IKT službenici suda.

I. Dostavljanje statističkih podataka i narativnog izvještaja o radu sudova za 2025. godinu

Tabele za obračun pojedinačnih i kolektivnih radnih rezultata u sudu dostupne su na internet adresi: <https://vstv.pravosudje.ba/vstvfo/B/141/article/143277>

Potrebno je da sudovi predmetne tabele preuzmu, popune i dostave VSTV-u BiH najkasnije do **02.02.2026. godine**, isključivo elektronskim putem, na e-mail adresu: vstvstatistika@pravosudje.ba

Molimo da kantonalni sudovi u Sarajevu i Odžaku sa navedene Internet adrese preuzmu tabelu za obračun radnih rezultata pod rednim brojem 6a, dok će ostali kantonalni i okružni sudovi preuzeti tabelu za obračun radnih rezultata pod rednim brojem 6.

Za tačnost i blagovremenost podataka u CMS-u i dostavljenih podataka u tabelama za obračun radnih rezultata u sudovima odgovorni su predsjednici sudova.

Posebno napominjemo da primjere u vezi načina obračuna individualne i kolektivne orijentacijske norme u sudovima možete pronaći u Instrukciji za obračun individualne i kolektivne orijentacijske norme u sudovima, u kojoj je navedeno detaljno pojašnjeno, i koja je dostupna na gore navedenoj internet adresi.

Podsjećamo da su sudovi obvezni pripremiti narativni izvještaj o radu suda za 2025. godinu u skladu sa **Smjernicama VSTV-a BiH** za izradu godišnjeg narativnog izvještaja o radu suda, koje se mogu preuzeti na gore navedenoj internet adresi.

Sudovi su dužni dostaviti ovaj izvještaj VSTV-u BiH najkasnije do **15.02.2026. godine**, na slijedeću e-mail adresu: vstvstatistika@pravosudje.ba.

Napominjemo, na navedenoj internet adresi postavljeni su relevantni materijali u vezi sa objavljivanjem sudskih odluka i informisanju o objavi odluka u 2025. godini. Popunjenu Tabelu za objavljivanje sudskih odluka sudovi su dužni dostaviti do **30.03.2026. godine** na e-mail adresu osde@pravosudje.ba.

Dodatno napominjemo da će VSTV BiH sudovima naknadno uputiti zahtjev da, sa gore navedene internet adrese, preuzmu, popune i dostave VSTV BiH popunjene tabele sa podacima potrebnim za popunjavanje Upitnika Europske komisije za efikasnost pravosuđa u okviru Vijeća Evrope za države iz regije Zapadni Balkan (Upitnik CEPEJ-a) za 2025. godinu.

II. Ocjenjivanje rezultata rada nosilaca pravosudnih funkcija u sudovima za 2025. godinu

Važeći Kriteriji za ocjenjivanje rada nosilaca pravosudnih funkcija u sudovima u Bosni i Hercegovini su usvojeni na sjednici VSTV-a BiH održanoj 18.12.2024. godine i objavljeni u Službenom glasniku BiH, broj 90/24, o čemu je VSTV BiH dostavilo obavještenje dopisom broj 06-08-1-5-1/2025 od 03.01.2025. godine.

Kriteriji za ocjenjivanje rada nosilaca pravosudnih funkcija u sudovima u Bosni i Hercegovini i obrasci za ocjenu rada nosilaca pravosudnih funkcija u sudovima za 2025. godinu dostupni su na internet adresi:

<https://vstv.pravosudje.ba/vstvfo/B/141/article/143277>

VSTV BiH je na sjednici održanoj 09. i 10.04.2025. godine usvojilo Uputstvo za primjenu kriterija za ocjenjivanje rada nosilaca pravosudnih funkcija u sudovima u Bosni i Hercegovini (broj: 06-08-1-5-5/2025), koji je dostavljen svim sudovima putem elektronske pošte dana 22.04.2025. godine i koji je dostupan na gore navedenoj internet adresi.

Pored navedenog, VSTV BiH je na sjednici održanoj 09. i 10.07.2025. godine usvojilo Uputstvo o algoritmu za nasumični odabir predmeta za analitičko ocjenjivanje rada nosilaca pravosudnih funkcija u sudovima (broj: 06-08-1-5-6/2025), koji je dostavljen svim sudovima putem elektronske pošte dana 11.07.2025. godine i koji je dostupan na gore navedenoj internet adresi.

U vezi sa primjenom Kriterija za ocjenjivanje rada nosilaca pravosudnih funkcija u sudovima u Bosni i Hercegovini i navedenih uputstava posebno skrećemo pažnju na slijedeće:

1. Učešće ocjenjivanog sudije u postupku ocjenjivanja (član 8. Kriterija za ocjenjivanje rada sudija u Bosni i Hercegovini)

Članom 8. Kriterija za ocjenjivanje rada sudija u Bosni i Hercegovini propisana je mogućnost ocjenjivanog sudije da na Obrascu broj 1. sačini izvještaj o svom radu koji sadrži opis njegovih sudijskih aktivnosti i procjenu sopstvenog rada, kao i da navedeni izvještaj dostavi predsjedniku suda i predsjedniku sudskog odjeljenja u vrijeme koje on izabere, a najkasnije do 15.01.2026. godine.

2. Kvantitet rada – Procenat realizacije plana rješavanja predmeta (član 7. Uputstva za primjenu kriterija za ocjenjivanje rada nosilaca pravosudnih funkcija u sudovima u Bosni i Hercegovini)

Odredbom člana 7. Uputstva za primjenu kriterija za ocjenjivanje rada nosilaca pravosudnih funkcija u sudovima u Bosni i Hercegovini detaljno je pojašnjen način obračuna procenta realizacije plana rješavanja predmeta u sudovima. Potrebno je posebno skrenuti pažnju da se prilikom obračuna procenta realizacije plana rješavanja predmeta za potrebe ocjenjivanja iz obračuna isključuju predmeti koji su u planu označeni da imaju procesnu ili zakonsku smetnju, odnosno potrebno je u CMS sistemu koristiti izvještaj „Realizacija plana u periodu izvješćivanja D/B“ na način da se odabere opcija „Prikaži samo rješive predmete“.

3. Nedovoljan broj predmeta za ostvarenje godišnje orijentacione norme (član 18. Kriterija za ocjenjivanje rada sudija u Bosni i Hercegovini i član 8. Uputstva za primjenu kriterija za ocjenjivanje rada nosilaca pravosudnih funkcija u sudovima u Bosni i Hercegovini)

Nastavno na član 18. Kriterija za ocjenjivanje rada sudija u Bosni i Hercegovini, članom 8. Uputstva za primjenu kriterija za ocjenjivanje rada nosilaca pravosudnih funkcija u sudovima u Bosni i Hercegovini propisana je obaveza predsjednika suda da ocjenjivanom sudiji, VSTV BiH i neposredno višem sudu dostavi obrazloženu informaciju najkasnije **do 15.10.** u toku perioda ocjenjivanja, sa naznakom da će rad jednog ili više sudija ocijeniti u okolnostima nedovoljnog broja predmeta u radu za ostvarenje godišnje orijentacione norme.

Stalna komisija za efikasnost i kvalitet sudova VSTV BiH je na sastanku koji je održan 08.12.2025. godine razmatrala informacije sudova o sudijama koji u 2025. godini rade u okolnostima nedovoljnog broja predmeta u radu za ostvarenje godišnje orijentacione norme, koje su sudovi dostavili nastavno na navedenu odredbu Uputstva za primjenu kriterija za ocjenjivanje rada nosilaca pravosudnih funkcija u sudovima u Bosni i Hercegovini i dopis VSTV BiH od 10.10.2025. godine, dostavljen svim sudovima elektronskom poštom. Stalna komisija za efikasnost i kvalitet sudova VSTV BiH je zaključila da neće biti uvažene eventualne naknadne informacije sudova da su određene sudije u 2025. godini radile u okolnostima nedovoljnog broja predmeta u radu za ostvarenje godišnje orijentacione norme.

4. Statistički kvalitet odluka (član 19. Kriterija za ocjenjivanje rada sudija u Bosni i Hercegovini)

Podsjećamo, instancioni sudovi imaju obavezu da vode odgovarajuće evidencije sadržane u tabeli Podaci o ukinutim odlukama ili odlukama koje se smatraju ukinutim a koje se neće uzimati u obzir kod izračuna statističkog kvaliteta odluka i najkasnije **do 15.01.2026. godine**, dostave podatke neposredno nižim sudovima i VSTV BiH o odlukama iz člana 19. stav (3) Kriterija za ocjenjivanje rada sudija u Bosni i Hercegovini i člana 26. stav (3) Kriterija za ocjenjivanje rada predsjednika sudova u Bosni i Hercegovini. Nižestepeni sudovi u broj ukinutih odluka prilikom računanja procenta ukinutih odluka iz člana 19. stav (1) tačka a) i b) Kriterija za ocjenjivanje rada sudija u Bosni i Hercegovini i člana 20. stav (1) tačka a) i b) Kriterija za ocjenjivanje rada predsjednika sudova u Bosni i Hercegovini, neće uzimati u obračun odluke evidentirane u tabeli dostavljenoj od strane višeg suda.

5. Analitička kvaliteta rada i odluka (član 20. Kriterija za ocjenjivanje rada sudija u Bosni i Hercegovini)

5.1. Predsjednik suda:

Kada je u pitanju element ocjene Analitička kvaliteta rada i odluka podsjeća se predsjednik suda na obaveze u vezi sa formiranjem izvora informacija iz člana 20. stav (2) Kriterija za ocjenjivanje rada sudija u Bosni i Hercegovini.

Predsjednik suda utvrđuje Analitičku kvalitetu rada i odluka nakon što pribavi sve potrebne izvore informacija i analizira zapažanja o radu ocjenjivanog nosioca pravosudne funkcije, u skladu sa odredbama člana 20. stav (3), (4), (5), (6) i (7) Kriterija za ocjenjivanje rada sudija u Bosni i Hercegovini. Ocjenjivač će prilikom utvrđivanja Analitičke kvaliteta rada i odluka, na osnovu navedenih izvora informacija, u Obrascu broj 10., odnosno Obrascu broj 4., odnosno Obrascu 5., obrazložiti svoj zaključak o stepenu uspješnosti ocjenjivanog nosioca pravosudne funkcije u pogledu nivoa ispunjenosti parametara Analitičke kvalitete rada i odluka iz člana 20. navedenih Kriterija.

5.2. Predsjednik sudskog odjeljenja:

Članom 6. Kriterija za ocjenjivanje rada sudija u Bosni i Hercegovini i članom 5. Uputstva za primjenu kriterija za ocjenjivanje rada nosilaca pravosudnih funkcija u sudovima u Bosni i Hercegovini propisana je obaveza predsjednika sudskog odjeljenja da izradi pismeno mišljenje o radu ocjenjivanog sudije na osnovu kontinuiranog praćenja rada, u skladu sa članom 17. Pravilnika o unutrašnjem sudskom poslovanju, tokom perioda ocjenjivanja i na osnovu dodatnog izvora informacija to jeste analize 3 (tri) predmeta ocjenjivanog sudije koje je predsjednik sudskog odjeljenja nasumično odabrao putem CMS-a. Za sudiju koji je raspoređen u rad u dva ili više sudskih odjeljenja tokom perioda ocjenjivanja izvor informacija Mišljenje predsjednika sudskog odjeljenja će biti pripremljeno u svim odjeljenjima.

Kada je u pitanju nasumični odabir predmeta za sudije koji su tokom perioda ocjenjivanja raspoređeni u rad u dva ili više sudskih odjeljenja, za takve sudije se uz pomoć IKT službenika u sudu vrši nasumični odabir ukupno 3 (tri) predmeta, kao i za sudije koji su raspoređeni da postupaju u jednom sudskom odjeljenju. Ukoliko za sudiju, koji sudijsku funkciju obavlja radeći na dva ili više odjeljenja, nasumičnim odabirom budu odabrane različite vrste predmeta iz djelokruga rada različitih odjeljenja, pregled i analizu predmeta vrši predsjednik sudskog odjeljenja u čiji djelokrug rada spada odabrani predmet (npr. predsjednik parničnog odjeljenja vrši pregled 1 (jednog) nasumično odabranog parničnog predmeta ocjenjivanog sudije, dok njegova 2 (dva) nasumično odabrana krivična predmete pregleda predsjednik krivičnog odjeljenja).

Predsjednik sudskog odjeljenja će mišljenje o radu ocjenjivanog sudije, uključujući zapažanja iz analize nasumično odabranih predmeta, sačiniti na Obrascu broj 2. i popunjeni obrazac dostaviti predsjedniku suda i ocjenjivanom sudiji najkasnije u roku od 45 (četrdesetpet) dana nakon isteka perioda ocjenjivanja, odnosno najkasnije do 16.02.2026. godine.

U cilju utvrđenja analitičke ocjene rada i odluka za predsjednika odjeljenja, shodno članu 20. stav (7) Kriterija za ocjenjivanje rada sudija u BiH, predsjednik suda prati i analizira rad na predmetima predsjednika sudskog odjeljenja tokom perioda ocjenjivanja, uključujući zapažanja iz analize 3 (tri) nasumično odabrana predmeta, na Obrascu broj 4.

5.3. Neposredno viši sud:

Predsjednici odjeljenja višeg suda će prilikom formiranja izvora informacija za utvrđivanje ocjene analitičke kvalitete rada i odluka Mišljenje predsjednika odjeljenja za predsjednika suda, koji je shodno članu 14. Pravilnika o orijentacionim mjerilima za rad sudija i stručnih saradnika u sudovima u Bosni i Hercegovini dužan neposredno raditi na predmetima i ostvarivati normu, primijeniti upute navedene u tački 5.2. ovog dopisa.

Ukoliko je odjeljenje višeg suda prilikom odlučivanja po pravnim sredstvima utvrdilo i zabilježilo podatke o odlukama iz člana 7. stav (1) Kriterija za ocjenjivanje rada sudija u Bosni i Hercegovini i člana 27. Kriterija za ocjenjivanje rada predsjednika sudova u Bosni i Hercegovini, neposredno viši sud će informaciju odjeljenja pripremiti i dostaviti predsjedniku neposredno nižeg suda najkasnije do 15.01.2026. godine. Ukoliko odjeljenje neposredno višeg suda nije zabilježilo navedene odluke u periodu ocjenjivanja za određeni nižestepeni sud, predsjednik neposredno višeg suda o tome dostavlja informaciju predsjedniku neposredno nižeg suda najkasnije do 15.01.2026. godine.

6. Unos obrazaca iz postupka ocjenjivanja rada nosilaca pravosudnih funkcija u bazu podataka VSTV-a BiH

U skladu sa Uputstvom za popunjavanje elektronskog obrasca u bazi podataka VSTV-a BiH i unos skeniranih obrazaca za ocjenjivanje rada predsjednika sudova i sudija u bazu podataka VSTV-a BiH, skrećemo pažnju da se za ocjenjivanog sudiju u bazu podataka VSTV BiH unose sljedeći obrasci:

- Obrazac za ocjenjivanje rada sudija: Obrazac broj 7 ili Obrazac broj 7.1.
- Obrazac broj 4., odnosno Obrazac broj 5. Obrazac broj 4, odnosno 5., se posebno skenira i unosi u bazu podataka VSTV BiH u za to predviđeno polje.

Što se tiče unosa obrazaca u bazu podataka VSTV BiH za ocjenjivanog predsjednika suda, Obrazac za ocjenjivanje rada (Obrazac broj 7.2 ili Obrazac broj 7.3) i Obrazac broj 6. se zajedno skeniraju i zajedno unose u bazu podataka VSTV-a BiH u za to predviđeno polje.

Od izuzetne je važnosti da se osigura da IKT službenici u sudovima postupaju u skladu sa Uputstvom za popunjavanje elektronskog obrasca u bazi podataka VSTV-a BiH i unos skeniranih obrazaca za ocjenjivanje rada predsjednika sudova i sudija u bazu podataka VSTV-a BiH.

7. Rok za provođenje postupka ocjenjivanja

U skladu sa članom 5. stavak (1) Pravilnika o postupku ocjenjivanja rada nosilaca pravosudnih funkcija („Službeni glasnik BiH“, br. 28/24 i 90/24) postupak ocjenjivanja rada je potrebno okončati i unijeti obrasce za ocjenjivanje rada u bazu podataka VSTV-a BiH najkasnije **do 01.04.2026. godine**. Stalna komisija nadležna za nadzor nad ocjenjivanjem rada nosilaca pravosudnih funkcija u sudovima (Stalna komisija za efikasnost i kvalitet sudova), u skladu sa članom 5. stav (5) Pravilnika je dužna izvijestiti VSTV BiH o ocjenjivačima koji propuste da blagovremeno provedu postupak ocjenjivanja.

Smatraće se da je ocjenjivanje rada okončano nakon što predsjednik suda o tome dostavi obavještenje na e-mail adresu vstvpravosudnauprava@pravosudje.ba. Ovo obavještenje će se bez odlaganja dostaviti VSTV-u BiH na Obrascu broj 9., koji je uvršten u materijale za ocjenjivanje rada na gore navedenoj internet adresi.

Podsjećaju se predsjednici sudova na dopis broj 06-08-1-2943-1/2024 od 05.08.2024. godine kojim su sudovi obaviješteni o zaključku sa sjednice VSTV BiH održane 17. i 18.07.2024. godine u vezi sa dostavljanjem informacije Uredu disciplinskog tužioca u slučaju da sudovi ne postupe po propisima i uputama VSTV BiH o provođenju ocjenjivanja.

Eventualna pitanja u vezi materijala za postupak izvještavanja o radu suda i ocjenjivanja rezultata rada nosilaca pravosudnih funkcija u sudu za 2025. godinu, možete dostaviti putem e-mail adrese vstvpravosudnauprava@pravosudje.ba najkasnije do 29.12.2025. godine.

Za sve dodatne informacije u vezi sa pripremanjem traženih statističkih podataka za 2025. godinu i provođenjem postupka ocjenjivanja rezultata rada nosilaca pravosudnih funkcija u sudu, molimo Vas da kontaktirate Odjel za pravosudnu analitiku i izvještavanje Sekretarijata VSTV-a BiH, putem naprijed navedene e-mail adrese.

S poštovanjem,

Predsjednik VSTV BiH


Dostaviti:

- Naslovu,
- Svim sudijama,
- Sekretarima sudova,
- Šefovima pisarnica,
- IKT službenicima u sudovima,
- Odjelu za unapređenje efikasnosti i kvalitete rada u sudovima Sekretarijata VSTV-a BiH,
- Odjelu za IKT Sekretarijata VSTV-a BiH,
- Odjelu za imenovanje i napredovanje Sekretarijata VSTV-a BiH.